

ՕԾՎԵՑ ԳՈՐԻՍԻ Ս. ՏՐԴԱՏ ՄԱՏՈՒՌԸ

Հունիսի 17-ին տեղի ունեցավ Սուրբ Տրդատ մատուռի հանդիսավոր օծման արարողությունը՝ հանդիսապետությամբ Սյունյաց թեմի առաջնորդ Գերաշնորհ Ս. Աբրահամ եպիսկոպոս Մկրտչյանի, մասնակցությամբ Սյունյաց թեմի Սյունիքի փոխառաջնորդ Ս. Աբգար վարդապետ Հովակիմյանի և Գորիսի հոգևոր հովիվ Ս. Շիրակ քահանա Խանոյանի: Արարողությանը ներկա էին Սյունիքի մարզպետ և այս եկեղեցու կառուցման բարերար տիար Սուրեն Խաչատրյանը, Գորիսի քաղաքապետ Ն. Ոսկանյանը, Սյունիքի մարզի համայնքապետեր, ինչպես նաև օտարերկրյա հյուրեր:

Հավարտ արարողության Սյունյաց թեմի Սյունիքի փոխառաջնորդ Ս. Աբգար վարդապետ Հովակիմյանն իր օրհնությունն ու բարեմաղթանքներն ուղղեց մարզպետին և շինարարներին՝ մասնավորաբար նշելով, որ Սյունյաց աշխարհը միշտ առանձնացել է եկեղեցակառույց Աստվածահաճո գործունեությամբ: Սյունյաց թեմի առաջնորդ Գերաշնորհ Ս. Աբրահամ եպիսկոպոս Մկրտչյանը ևս օրհնության խոսքն ուղղեց Սուրբ Տրդատ մատուռի բարերարին և ճարտարապետ-շինարար Սևադա Զաքարյանին:

ԴԻՎԱՆ ՍՅՈՒՆԻՔԻ ՓՈԽԱՌԱԶՆՈՐԴՈՒԹՅԱՆ

ՕԾՎԵՑ ՍԵՎԱՆԻ ՑԱՄԱՔԱԲԵՐԴ ԹԱՂԱՄԱՍԻ Ս. ԳԵՎՈՐԳ ԵԿԵՂԵՑԻՆ

Հունիսի 23-ին օծվեց Գեղարքունիքի թեմի Սևանի Ցամաքաբերդ թաղամասի Ս. Գևորգ եկեղեցին: Եկեղեցին կառուցվել է 19-րդ դարի վերջում գյուղի բնակիչների միջոցներով և սերտորեն կապված է եղել Սևանա կղզու վանական միաբանության հետ:

Խորհրդային շրջանում այն ծառայել է որպես գյուղի պահեստ: Իշխանությունների անտարբեր վերաբերմունքի պատճառով այն սկսել է քանդվել և մինչև վերջերս գտնվում էր կիսավեր վիճակում:

Եկեղեցու ամբողջական նորոգությունը ստանձնեց արմատներով ցամաքաբերդի տիար Վալտեր Մարությանը: Հունիսի 23-ին Գեղարքունիքի թեմի առաջնորդ Գերաշնորհ Ս. Մարկոս եպիսկոպոս Հովհաննիսյանի ձեռամբ օծվեցին նորոգված եկեղեցու Սուրբ Սեդանն ու Մկրտության ավազանը:

Սրբազան արարողությանը ներկա էին ՀՀ կառավարության անդամներ, Սևանի քաղաքապետ Գ. Մալխասյանը, մտավորականներ ու հասարակական գործիչներ և բազում հավատացյալներ:

*ՄԱՅՐ ԱԹՈՌ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*